


Sommaire des Moyens d'opposition de l'Vniuersité de Paris, aux Lettres patentes obtenues par aucuns des Imprimeurs & Libraires au mois de Decembre de l'année 1649. à la Declaration du 20. dudit mois & an, & à dix nouveaux Articles: Comme aussi des Moyens & raisons de sa Requeste Civile, contre les Arrests du 7. Septembre. 1649. & du 9. Iuillet 1618.

Quelques-vns des Imprimeurs, Libraires, & Relieurs ont obtenu des lettres Patentes contenant 37. Articles au mois de Decembre 1649. vne Declaration le 20. du mesme mois & an; & encore ont fabriqué dix nouveaux Articles le 17. Mars 1650. & ayans esté présentés à la Cour, elle a par son Arrest du 7. de Septembre 1650. ordonné *Que douze personnes notables, de literature & experience au fait de la Librairie & Imprimerie donneroient leurs aduis sur la commodité ou incommodité que le public peut recevoir de l'exécution du contenu aux Articles 26. 27. 28. & 29. dudit Edict concernant les nouveaux priuileges pour faire r'imprimer les anciens Liures cy-deuant imprimés: Ensemble sur ladite Declaration du 20. Decembre 1649. & nouveaux Articles du 17. Mars 1650.* L'Vniuersité en ayant esté aduertie & recogneu, que l'entreprise de celsdits Imprimeurs & Libraires estoit cōtraire à ses droits, supprimoit non seulement les Offices de ses quatre principaux Iurez, mais de ses vingt-quatre Libraires, deux Relieurs, deux Enlumineurs, & deux Escriptuains Iurez; qu'elle estoit aussi contraire aux Edicts & Declarations des Rois, Arrests du Conseil, & du Parlement; & estoit preiudiciable à l'Eglise & à l'Estat; ruinoit l'Imprimerie; couuroit les abus & maluersations de ces Imprimeurs & Libraires, fomentoit leur auarice, & opprimoit vn grand nombre de Familles; a formé opposition, & y a esté receuë par Arrest du 21. Ianuier 1651. en a donné ses Moyens le 2. May ensuiuant, & s'est pourueuë par Lettres en forme de Requeste ciuile, tant contre ledit Arrest du 7. de Septembre 1650. que celui du neuuiesme Iuillet 1618. par lequel des Lettres patentes auoient esté verifiez par surprise, & sans qu'elle eust esté ouïe ny appellée; comme il est pleinement prouué dās ses Repliques signifiez aux parties le 13. Ianuier 1652 & dont quelques Moyens & raisons sont icy briuemēt representés.

Les Lettres Patentes, & les dix nouveaux Articles se trouuent imprimés en vn Recueil intitulé, *Actes concernant le pouuoir & la direction de l'Vniuersité, sur les Escriptuains, & les Imprimeurs, &c.*

Par les premiers Articles de leurs pretendus Statuts des années 1618. & 1649. ils veulent jouir de tous les droits, priuileges, franchises, libertiez, preseaunces & prerogatiues attribuez à l'Vniuersité, sans estre receus par le Recteur, lui prester le serment, deferer



2

à ses ordres, sans reconnoistre les loix de l'Vniuersité, & sans estre escrits sur le Registre de la Cour des Aydes. Ce qui est contraire aux Edicts & Declarations de Charles VIII. 1488. de Louis XII. 1513. & de François I. 1516. & 1543. confirmez de temps en temps par leurs successeurs; par lesquelles seulement vingt-quatre Libraires, deux Relieurs, deux Enlumineurs, & deux Escriptuains Iurez doiuent iouir des priuileges de l'Vniuersité.

Le 4. qui est conforme au 2. Article de 1618. & deffend à toutes personnes de tenir Imprimerie ou Boutique, qu'il n'ait fait son apprentissage en cette Ville l'espace de quatre ans, & seruy les Maistres trois ans; est contraire à l'Arrest du dernier Février 1609. qui oblige seulement à faire trois années d'apprentissage, & servir les Maistres deux ans; & à l'Edict de 1571. qui porte que, l'Apprentif de là en auant sera receu à besongner tant es impressions de Paris que de Lion, & par tout ailleurs, encore qu'il eust fait son apprentissage autre part.

L'injonction faite aux Imprimeurs par l'Article 5. de prendre seulement vn Apprentif, qui soit congru en la langue Latine, & sçache lire le Grec, est contraire aux Edicts de François I. du 28. Decembre 1541. de Charles IX. de 1571. par lesquels les Maistres Imprimeurs peuvent faire & prendre autant d'Apprentifs que bon leur semblera; Deplus estre congru en la langue Latine, & sçauoir lire le Grec, n'est pas assez pour vn Imprimeur, qui au moins doit estre suffisamment versé es lettres Grecques & Latines.

L'Article 8. qui oblige les nouueaux Maistres à payer 300. liures à la Communauté, fauorise les exactions de quelques particuliers; fomente les procez; & est contraire à l'ordre de l'Vniuersité, par lequel l'Apprentif trouué par le Recteur suffisamment versé es Lettres humaines; & les quatre principaux Iurez ayans certifié le Recteur de sa capacité en l'Art de l'Imprimerie & Librairie, est receu Imprimeur Libraire. Et mesmes par Arrest du 6. May 1615. il est ordonné que l'on payera seulement quinze liures.

Sur l'Article 9. qui est conforme au trentième de 1618. & ne fait distinction de l'Imprimeur, Libraire, & Relieur; l'Vniuersité a supplié la Cour, de defendre à ceux des Relieurs & Libraires, qui à peine sçauent lire, de prendre la qualité d'Imprimeurs; Autrement les abus, qui ont esté rapportés dans les Repliques sur le mesme Article 9. continueront tousiours.

L'Article 11. qui defend d'imprimer de nouueaux liures, sans premierement en auoir priuileges, ne retranchant pas tous les abus pernicieux qui arriuent tous les iours: l'Vniuersité a supplié la Cour d'ordonner, qu'il ne sera point octroyé de priuilege, pour aucuns nouueaux liures, qu'ils n'ayent esté veus & approuuez par l'Vniuersité, ou par celle de ses Facultez, à laquelle appartient la ma-

tiere dont les liures traittent, conformément aux Reglemens de 1323. 1342. Arrests de la Cour des 18. Mars & 4. Novembre 1521. 7. Ianuier 1523 du 2. May 1535. & aux Edicts de 1547. & 1551.

L'Article 12. est semblable au 14. de 1618. & *deffend seulement aux Auteurs & Correcteurs des liures, de tenir Imprimeries ny Presses en leurs maisons*; sans parler des remedes, qu'il conuient necessairement apporter à l'ignorance, & autres defauts des Correcteurs, qui ont esté representez dans lesdites Repliques sur le dit Article 12. Et pource l'Vniuersité a conclud, à ce que les Maistres Imprimeurs, qui ne pourront suffire à la correction des liures, soient tenus d'auoir des Correcteurs approuuez par le Recteur de ladite Vniuersité, & qui soient bien versez dans les Langues & Sciences, & intelligensés liures des Auteurs, conformément aux Edicts de 1541. & de 1571.

L'Article 13. qui est conforme au 19. de 1618. & *concerne la visite des liures qui sont apportez de dehors*; est contraire au droit qu'à l'Vniuersité, de faire la visite des liures par ses quatre principaux Iurez, en la presence des personnes par elle deputez, conformément aux termes du Reglement de 1403. rapportés dans les Repliques sur le mesme Article; à l'Arrest du 1. Iuillet 1542. qui fait deffenses sur peine de confiscation de la Marchandise, & autres peines à la discretion de la Cour, à tous Libraires & autres Marchands de quelque qualité qu'ils soient, *d'exposer en vente aucuns Liures en cette Ville ou autres Villes de ce ressort, s'ils n'ont esté visitez*; quant à la Ville de Paris, en la maniere qui s'ensuit. C'est asçauoir, que les Libraires ou autres Marchands qui voudront exposer en vente aucuns liures, qui leurs seront venus de nouueau, auant qu'ouurer leurs Balles, seront tenus appeller quatre Libraires Iurez pour assister à la dite ouuerture, & voir les liures qui y sont. Et selon la science & qualité dont lesdits liures seront, lesdits quatre Libraires Iurez aduertiront le Recteur de l'Vniuersité de Paris, & Doyens des trois Facultez d'icelle pour voir & visiter lesdits liures. Et à cette fin sera tenu le Recteur commettre pour la visitation des Liures de Grammaire, Logique, Rhetorique, Philosophie & Lettres humaines, deux Maistres ès Arts, bons personnages, sçauans & non suspects. Et quand aux liures concernans la Theologie & Religion Chrestienne, la Faculté d'icelle commettra aussi deux notables Docteurs vacans de toute suspicion pour voir & visiter lesdits liures. Et la Faculté de droit Canon en commettra aussi deux autres non suspects pour la visitation des liures en droit Canon & Ciuil. Et pareillement la Faculté de Medecine, quant aux liures de Medecine pour visiter lesdits liures; & à l'Edict de Henry II. du 27. Iuin 1551.

Par les Articles 14. & 15. semblables au 20. & 21. de 1618. & qui portent, que *les Libraires forains ne pourront tenir Boutique, Magazin,*

* Donnée sur la Requête des Syndic & Adjoints, par laquelle ils exposent, que tous Libraires forains doivent faire leurs changes dans 3. semaines, après quoy ils sont obligez de fermer leur Magazin; & conclusions, à ce que le nommé Elzeuir soit condamné en l'amende, Que dās trois semaines à conter du iour de l'ouuerture de ses balles, il soit tenu de fermer son Magazin; & que deffenses luy soient aussi faites de vendre en gros, ny en détail aucuns liures blancs ny reliez conformémēt ausdits Reglemēs, (aucun Reglement ne contient ces choses, non pas mesmes le pretendu de l'année 1618.) à peine de confiscation, & d'estre priué, de plus pouuoir apporter de liures en cette Ville, il sur enioint par ladite Sentence audit Elzeuir de fermer son Magazin trois semaines apres l'ouuerture de ses Balles, avec deffenses de vendre ny debiter aucuns liures en blanc ou reliez, sinon aux Libraires, le tout conformémēt aux Reglemēs à peine de cent liures d'amende, & confiscation de sa Marchandise, sans autre forme ny figure de procez.

ny faire afficher leurs liures, demeurer plus de trois semaines à Paris, & ausquels ils ont adiousté, que les Libraires forains ne pourront venir qu'une fois l'année, ny vendre mesmes, ny distribuer leurs liures à autres qu'aux Libraires, ausquels seulement ils les pourront vendre ou eschanger; ces Libraires taschent de faire autoriser par la Cour ce qu'ils ont obtenu par Sentence du Lieutenant Ciuil le 27. Avril 1641. * sous de fausses suppositions; & d'estre les seuls Maistres de l'Imprimerie, empescher que les bons liures bien & correctement imprimez, ne soient apportés en cette Ville; & ainsi triompher des Imprimeurs & Libraires des autres Villes, continuer sur les Gens de lettres leurs exactions intolerables, & les obliger d'acheter les liures à leur mot. Et ces Articles sont contraires aux Lettres patentes de Henry II. du 23. Septembre 1553. par lesquelles, il fait deffenses à tous ses Officiers, sur le fait & reglement des droicts de la traite & imposition foraine, resue, Domaine forain & haut passage, & à tous autres qu'il appartiendra, de ne leuer ou exiger aucune chose desdits droits pour raison des liures EN QUELQUE TEMPS QUE CE SOIT. Et à plusieurs autres Declarations des Roys & Arrests du Parlement rapportez dans lesdites Repliques sur les mesmes Articles.

Les Articles 18. & 19. qui sont conformes aux 24. & 25. de 1618. & par lesquels les Imprimeurs, Libraires & Relieurs, au preiudice des quatre principaux Iurez de l'Vniuersité, s'attribuent le pouuoir de faire les descriptions & prisées des liures, les inuentaies des Imprimeries & de leurs vtancilles; sont contraires aux Reglemens de 1275. 1323. 1342. 1403. aux Lettres Patentes de Charles VI. du 20. Iuin 1411. à l'Arrest de la Cour du 27. Iuin 1577. qui fait deffenses à toutes personnes de faire aucune prisee ou inuentaie d'aucuns liures blancs ou reliez, neufs ou frippes, sinon ausdits vingt-quatre Iurez de l'Vniuersité.

L'Article 21. qui est conforme au 18. des pretendus Reglemēs de 1618. & enioint aux Syndic & Adjoints de faire exactement les visites par les Imprimeries au moins deux fois l'année; est contraire au droit qu'à ladite Vniuersité de visiter les Imprimeries & Boutiques des Libraires par ses quatre principaux Iurez, en la presence de ses Deputez. Est aussi contraire aux Reglemens de 1323. 1342. aux Lettres Patentes de Charles VI. & à l'Arrest du 30. Octobre 1542. qui enioint sur peine de prison, d'amende arbitraire & punition corporelle, de représenter, exhiber & mettre entre les mains desdits demandeurs, deux des quatre principaux Iurez, tous & chacuns les liures qui seront par eux demandez, pour estre veus & visités; & à l'Edict de 1551. qui contient presque semblables termes que le susdit Arrest.

L'Article 25. qui est conforme au 17. de 1618. & qui concerne la maniere de l'eslection des pretendus Syndic & Adjoints, est celuy pour lequel tant d'Articles ont esté fabriqués, tāt de machines remuées; & par

lequel les pretendus Syndic & Adjoints veulent vsurper vne domination absolue, sur tout le fait de l'Imprimerie & Librairie; oster à l'Vniuersité les Offices de ses quatre principaux Iurez, qui les ont tousiours fidelemēt exercé à l'honneur & aduantage du public, au profit & contentement des Imprimeurs & Libraires, & supprimer ensuite les Offices de ses 24. Libraires, deux Relieurs, deux Enlumineurs & deux Escriptuains Iurez, pour se soustraire entierement de sa direction, & acheuer hardiment ce qu'ils n'auoient commencé qu'avec timidité: Car dans leurs Reglemens de 1618. ils n'ont osé oster tout à fait les qualitez des Officiers de l'Vniuersité, mais ils y ont retenu en plusieurs Articles les noms de *Gardes & Iurez de l'Vniuersité*; croyans auoir assez auancé leur dessein, de ce qu'ils y auoient glissé les noms de Syndic & d'Adjoints, afin de surprendre plus aisément la religion de la Cour, en adioustans aux anciennes qualitez conuës de ladite Cour ces nouvelles & inouïes, pour les faire passer sous le nom des anciens Officiers de l'Vniuersité: & de ce qu'ils y auoient ietté le premier fondement de leur vsurpation; puis que iusques à ladite année 1618. ce terme d'*Adjoint* auoit esté inouï: Et celuy de Procureur Syndic est aussi imaginaire; puis qu'il ne peut auoir de fondement que sur vn Arrest rendu par la Chambre des Vacations le 1. Octobre 1571. lequel permet aux 24. Libraires Iurez d'esslire vn Procureur Syndic, *pour faire les diligences necessaires pour les significations de l'Edit de 1571.* De sorte que ledit Procureur Syndic n'estoit qu'un *Solliciteur de leurs affaires*, sans qu'il se pût mesler du fait de l'Imprimerie & Librairie. Et de fait dans les Arrests de la Cour du 27. Iuin 1577. du 3. Aoust 1579. Declaration de Henry III. du 16. Nouembre 1582. Arrest du Conseil du 14. Mars 1583. Declaration du mois d'Auрил 1583. Arrest de la Cour du 14. Mars 1586. Arrest du Conseil du 22. Septembre 1587. Arrest du Conseil du 17. Decembre 1594. Lettres patentes de Henry IV. du 20. Février 1595. Arrest du dernier Février 1609. qui contiennent la plus grande partie des Reglemens de l'Imprimerie & Librairie, & des franchises & immunités accordez ausdits Imprimeurs comme Supposts & Officiers de l'Vniuersité, il n'est fait aucune mention de Syndic, mais du Recteur & Vniuersité & de ses Iurez. Et mesme depuis quelque temps aucuns d'eux, ayans voulu introduire l'esslection dudit pretendu Procureur Syndic, pour faire les fonctions qu'il vsurpe auourd'huy, cette nouueauté a causé les desordres & les diuisions, qui se voyent parmy les Imprimeurs & Libraires: De sorte que la Cour voit l'importance d'oster la cause de tous ces desordres & confusions, & ne permettre à autres qu'aux quatre principaux Iurez de l'Vniuersité de faire les fonctions concernantes l'Imprimerie & Librairie, que les pretendus Syndic &

* Dont ils ont fait donner copie à chacun particulier de la Communauté, où ils disent, qu'ils ont l'honneur d'estre du corps de l'Vniuersité; & protestent de demander l'adjonction de Monsieur le Recteur, qui est la véritable partie.

* Défendons de faire aucun exercice de ladite Religion en la Ville de Paris. Article 14.

Ne pourront les liures concernans ladite Religion pretendre reformée estre imprimés & vendus publiquement, qu'és Villes & lieux où l'exercice public, de ladite Religion est permis, Art. 21. Ce sont les termes de l'Edit de Nantes, donné au mois d'Avril 1598.

* En l'année 1643. Rocoler, Vitre, & quelques autres, ayans obtenu par surprises lesdits Priuileges defendus, la Communauté du consentement de M. le Procureur General, eust vne Commission de la Cour du 13. Iuin audit

Adjoints veulent aujourd'huy vsurper, sans aucun fondement, & contre leur propre Declaration, qui se voit par leur acte de l'année 1648. * Et au preiudice du droit de l'Vniuersité, qui a esté monstré par tous les actes icy rapportez sur chaque article, & par vne infinité d'autoritez, de Declarations des Roys, d'Arrests du Conseil & du Parlement, & d'autres Actes faits depuis 600. ans presque d'années en années sans intermission iusques à present, & dont l'on a cotté les dates dans lesdites Repliques sur le mesme Article 25, & vne partie a esté imprimée en vn Recueil intitulé, *Actes concernans le pouuoir & la direction de l'Vniuersité de Paris, &c.* Autrement on verra tousiours regner ces débats & contentions parmy les Imprimeurs & Libraires, qui les ruinent, & incommodent le public; & les liures seront tousiours tres-mal imprimez, remplis de fautes & erreurs imprimez sur de mauuais papier, & vendus à prix excessif; Et les Imprimeurs & Libraires, chez lesquels la cherté fait l'estime & la bonté des liures, & qui vendent ordinairement plus cher ceux qui sont faits contre l'honneur de Dieu, la Religion, le seruice du Roy, repos de l'Estat & bonnes mœurs; continueront à les imprimer, faire apporter & vendre, comme ils ont fait, en si grand nombre depuis le temps que quelques-vns taschèt de se soustraire de la direction de l'Vniuersité, que la Faculté de Theologie par ses Censures, l'Vniuersité par ses Decrets, & mesme le Parlement par ses Arrests n'en ont pû arrester le cours; Aussi les Moyens des Defendeurs signez de Guillemot Syndic & de trois Adjoints, & signifiez à l'Vniuersité le 26. Mars 1652. portent qu'à l'esgard des liures qui viennent de dehors, concernans la Religion pretendue reformée, LA COVR SCAIT que par les Edicts * de pacification, qui permettent la liberté de conscience, ILS PERMETTENT AVSSI L'IMPRIMERIE ET LA VENTE DE TELS LIVRES, & que LE DEBIT S'EN FAIT PVBLIQUEMENT en consequence desdits Edicts. Et soustiennent que la visite dans les Boutiques, & les memoires des liures n'appartiennent à l'Vniuersité; Au MOYEN DE LA LIBERTÉ PORTEE PAR LES EDICTS DE PACIFICATION. Le pouuoir & l'obligation qu'à l'Vniuersité de visiter les liures, sont suffisamment prouuez; elle ne pretend rien contre les Edicts de Pacification, qu'elle a produits, pour faire paroistre la hardiesse & mauuaise foy de ses parties.

L'Article 26. qui concerne l'obtention des priuileges du Roy, pour imprimer les liures des anciens Autheurs, de ceux imprimez hors le Royaume, & de ceux dont les Priuileges sont expirez, a esté fabriqué par les nomméz Targa, * de la Perriere, Iean Iost, Rocoler, Bilaine, Chaudiere, Vitre, Chastelain, Pierre Blaise, Guedois, Aliot, Soly, Cra-moisy, afin de jouir des priuileges qu'ils auoient obtenus, pour

r'imprimer plusieurs *anciens Auteurs*, comme il appert par vne Commission du 13. Iuin 1643 pour les faire assigner en la Cour. Est entierement preiudiciable au bien & commodité du public, ruine les Gens de lettres & Escholiers; d'autant qu'un seul ou quelques associez ayans priuatiuement à tous autres le pouuoir d'imprimer vn liure, ils le rendront aussi rare que bon leur semblera, ils opprimeront leurs Confreres; diminueront les graces du Prince, osteront l'émulation, s'entretiendront dans leur negligence, & empescheront plusieurs personnes de s'adonner à l'Imprimerie; & priueront le Royaume du profit des liures qui se débiteroient aux Estrangers. Tels priuileges sont contraires aux Arrests du Conseil du 14. Mars 1583. du 2. Iuin 1603. du 23. Decembre 1611. Aux Arrests de la Cour du 15. Mars 1586. du 7. Février 1612. du 19. Aoust 1617. du 3. Aoust 1579. par lequel la Cour ordonne, *que l'on n'aura esgard aux priuileges, sinon pour les liures qui n'ont esté encore imprimés par cy-deuant. Et pour le regard des autres ja imprimez, qu'ils seront imprimez par tous les Imprimeurs, qui les pourront & voudront imprimer en pleine liberté.* Les Deffendeurs, disent que la Cour a interloqué cet Article par Arrest du 7. de Septembre 1650. & qu'il y a vn procez verbal contenant l'aduis de douze personnes de literature; A quoy l'on respond que ledit Arrest est interuenu, & ledit procez verbal a esté dressé sur leurs seules pieces le 19. Octobre 1650. l'Vniuersité n'estant entrée en cause qu'au mois de Ianuier 1651. & n'ayant donné ses Moyens, & produit ces Reglemens, Declarations & Arrests que le 2. May ensuiuant.

Sur l'Article 28. qui porte, *que l'intention de sa Majesté est, que les liures soient vendus à prix raisonnable*, l'Vniuersité a cōclud à ce que le prix des liures soit réglé & taxé par le Recteur de l'Vniuersité, Doyens des Facultez, & Procureurs des Nations, appellés les quatre principaux Iurez, avec l'Imprimeur qui aura imprimé le liure, & celuy qui l'aura fait imprimer; & que les Imprimeurs & Libraires exposent en lieu apparent de leurs Boutiques, vn catalogue contenant ledit prix & taxe, comme ils y sont obligez par les Reglemens de 1275. 1323. 1342. 1403. & 1567. rapportés dans lesdites Repliques sur ledit Article 28. & par l'Edict de Henry II. qui ordonne *que tous Imprimeurs, Libraires Marchands seront tenus & contraints d'auoir vn catalogue, & le tenir en leurs Boutiques affiché en lieu euiden, de tous les liures qu'ils auront en leursdites Boutiques.* Charles IX. dans l'Edict de 1571. ordonne *que lesdits Libraires ayans meilleur marché des iournées & salaires des Compagnons, seront tenus de diminuer le prix des liures selon l'aduis des Recteur, Doyens, Maistres, & 24. Libraires Iurez de ladite Vniuersité.* L'on a produit au procez les catalogues de plusieurs Imprimeurs, contenans le prix de leurs liures faits és années 1546.

an 1643. par laquelle il luy fust permis de faire assigner ledit Rocollet, Vitre, & tous autres qui auoient obtenu lesdits Priuileges, pour voir dire qu'ils seroient cassez & reuozuez. Ce qu'ayant esté fait dès lors, & lesdits Rocollet & Vitre ayas recogneu par la communication faite au Parquet, que leur cause n'estoit iugée ny iuste ny raisonnable, apprehendās leur confusion, leur entreprise estāt contre la liberté publique, contraire à l'usage & aux edits & Arrests celebres, ladite instance fust abandonnée de part & d'autre, iusques au mois de Decembre dernier 1649. qui sont sept années entieres d'intervalle; Pendant lesquelles lesdits Rocollet & Vitre abusans de la faueur de M. le Chancelier avec quelques autres, fabriquerēt à l'insceu de lad. Communauté led. pretendu Reglement de 1649. Les Syndics ne peuvent ignorer lesdites oppositions, puis que du Bois Procureur de ladite Communauté, iustifie cinq ces signatures & d'auantage pour ladite opposition. Ce sont les termes de la Requête de la Communauté des Imprimeurs de la Ville de Paris.

1552. 1562. Et l'on peut adiouster que les liures, qui s'impriment en Espagne portent la taxe de leurs juste prix.

Le 1. des 10. autres Articles est contraire aux Lettres patentes de Henry II. de François I. & de Charles IX. rapportez dans lesdites Repliques, avec vn Arrest du 2. Mars 1564. par lequel les Libraires faisans transporter des liures, doiuent prendre passe-port du Recteur de l'Vniuersité, afin qu'ils soient francs & exempts. Ce qui a esté pratiqué iusques à ce temps.

* MONSIEUR,
Les Syndic & Adoints vous supplient d'enuoyer au logis du Syndic, ou de donner au Clerc de la Communauté, qui ira chez vous, vn de chaque sorte des Liures que vous deuez donner, & que vous auez imprimés depuis 5 ans en ça, iusques au 17. Mars 1650. tant vieux que nouueaux, usages & autres, soit de Cōpagnie ou en particulier suiuant l'Article 15. de l'ancien Reglement: & depuis le susdit iour 17. Mars 1650. suiuant le resultat de la Communauté auditiour, deux de chaque Liures in folio, quatre des in quarto, & six de toutes les autres grandeurs, tant Usages qu'autres, que prendrez, la peine d'escrire, ou faire escrire sur le Liure de ladite Communauté, pour estre employez aux affaires pressantes d'icelle, attendant qu'il n'y a aucun fond.

Le 2. Article qui defend aux Imprimeurs, & à tous autres demeurans en cette Ville, de faire imprimer hors Paris, à peine de confiscation des liures, & de cinq cens liures d'amende; & le 5. qui deffend à tous Libraires, Imprimeurs & Relieurs de prester leur nom aux Forains & aux Auteurs, pour afficher ou faire adresse de la vente de leurs liures, à peine de cinq cens liures; & aux Auteurs de mettre au bas de la premiere page autre chose qu'à Paris, de l'Imprimerie d'un tel, aux despens de l'Auteur sans aucune adresse; sont contraires à l'vsage & pratique, qui a esté rapporté dans lesdites Repliques, sur lesdits deux Articles; ostent la liberté aux Auteurs de pouuoir faire bien & correctement imprimer leurs Ouurages; & fauorisent la negligence de ces Imprimeurs & Libraires.

Les 6. & 7. qui enjoignent aux Imprimeurs, Libraires & Relieurs, de deliurer au Syndic deux exemplaires de tous les volumes IN FOLIO, quatre des IN QUARTO, & six des autres liures de diuerses grandeurs, tant usages Romains que particuliers. Et que tout Auteur faisant imprimer vn liure à ses despens, sera obligé d'en donner VNE DOVZAINÉ d'exemplaires à la Communauté de quelque grandeur qu'ils soient, avec injonction aux Imprimeurs & Relieurs de les retenir. La lecture seule de ces deux Articles seroit capable d'attirer la hayne publique sur les pretendus Syndic & Adoints, qui veulent de leur propre autorité introduire vn monopole inouïy sur les Auteurs, & leurs Confreres, auxquels ils ont enuoyé ce Mandement. *

L'Article 9. qui porte, qu'il sera mis sur la feüille le nom de trois Libraires & trois Imprimeurs, duquel nombre sera esleu le Syndic, fait voir les nouueaux artifices qu'employent tous les iours les pretendus Syndic & Adoints, pour effectuer leur vsurpation.

Le 10. qui enjoint aux Libraires, Imprimeurs ou Relieurs qui obtiendront prolongation de Priuilege, ou Priuilege d'un ancien liure, & des liures imprimez hors le Royaume, de donner six exemplaires de chacun volume IN FOLIO, & 25. de toutes les autres grandeurs, a esté dressé par les pretendus Syndic & Adoints, afin d'auoir vn fond tres ample pour paruenir à leurs desseins; est tres preiudiciable au public, & contraire aux Arrests du Conseil & de la Cour.